


**Ni Presidente
Henry B. Eyring**

Umuna a Mammagbaga iti
Umuna a Panguluén



Serbisio ken Agnanayon a Biag

Ti Mangisalakan ti pagwadantayo iti saan a mangimbubukod a panagserbi. Impaayna ti naan-anay a biagna iti panagserbi iti Nailangitan nga Ama ken iti amin nga annak ti Amana. Ti nagkaykaysa a panggep ti Ama ken ti Anak ket ti mangted kadatayo amin iti sagut ti imortalidad ken ti bendision ti agnanayon a biag (kitaen iti Moises 1:39).

Tapno maikari iti agnanayon a biag, nasken nga agbalaliwtayo babaen ti Pannubbot ni Jesucristo—nayanak manen ken nadalusan manipud iti basol. Dagiti babassit nga ubbing nga agtawen iti walo, nupay kasta, ket awan basolda ken nasubbotda babaen ti Pannubbot (kitaen iti Mosiah 3:16, 21; Moroni 8:10–12).

Para iti amin kadatayo a nakadanon iti tawen nga addan sungsubangan, adda napintas a plano a mangpalugod kadatayo a madalusan manipud iti basol ken makapagsagana para iti agnanayon a biag. Dayta a panagsagana ket mangrugi iti panagbuniag babaen ti awtoridad ti priesthood ken ti panangawat iti Espiritu Santo. Kalpasanna nasken a kanayon a laglagipentayo ti Mangisalakan ken tungpalentayo dagiti bilin nga intedna kadatayo.

Imbaga ni Ari Benjamin kadagiti taona iti Libro ni Mormon maipapan iti rag-o a sumangbay manipud iti pannakarikna iti pannakapakawan manipud iti basol babaen ti Pannubbot ni Jesucristo. Kalpasanna

sinuruanna ida a mangpatalinaed iti pannakaugas dagiti basbasolda, nasken a suruanda dagiti annakda nga agserbi iti tunggal maysa ken nasken nga agbalinda a managparabur agingga a kabaelanda tapno maited dagiti temporal ken espirtual a kasapulan dagiti adda iti aglawlawda. (Kitaen iti Mosiah 4:11–16.)

Insurona pay, “Ket adtoy, ibagag dagitoy a banag kadakayo tapno masursuroyo ti pagsiriban; tapno mampuanayo a no agserbikayo iti padayo a tao, agserserbikayo laeng iti Dios” (Mosiah 2:17).

Namagpagna ni Jesus a nangisursuro iti ebangheliona ken nagar-aramid iti kinaimbag (kitaen iti Dagiti Aramid 10:38). Inagasanna dagiti masaksakit. Pinagungarna dagiti natay. Babaen ti pannakabalinna pinakanna dagiti umariwekwek a tao idi mabisin ken awan makanda (kitaen iti Mateo 14:14–21; Juan 6:2–13). Kalpasan ti Panagungarna inikkanna iti taraon ti sumagmamano kadagiti Apostolna idi simmalogda iti Taaw ti Galilea (kitaen iti Juan 21:12–13). Kadagiti kontinente ti America, inagasanna dagiti masakit ken saggaysa a binendisionanna dagiti ubbing (kitaen iti 3 Nephi 17:7–9, 21).

Sinuruannatayo ni Santiago nga Apostol no kasano nga agsulbod ti tarigagay nga agserbi kadagiti dadduma manipud iti panagyamantayo iti inaramid ti Apo para kadatayo:

“Ngem ti mangsukimat iti linteg a naan-anay nga isu

ti linteg ti wayawaya, ket pagtalinaedenna ket saan a managdenggeg a makalipat, no di ket managaramid iti aramid, daytoy a tao nagasatto kadagiti ar-aramidna. . . .

“Ti panagdaydayaw a nadalus ken awan tulawna iti imatang ti Diostayo ken Ama, isu daytoy: Sarung-karan dagiti awan ti ammada ken dagiti balo a babbai iti ladingitda, ken agannad nga awan tulaw ti lubong” (Santiago 1:25, 27).

Maysa kadagiti pammatalged a mapatpatarnawkayo ket ti napadakkel a tarigagay nga agserbi iti dadduma para iti Mangisalakan. Ti home teaching ken visiting teaching ket agbalin nga ad-adda a rag-o ken babassit nga aramid. Matakkuatam ti bagim a masansan nga agbolboluntario iti maysa a pagadalan iti lugaryo wenno tumultulong a mangtaripato kadagiti napanglaw iti purokyo. Nupay mabalina a bassit ti kuartam tapno mangtedka kadagiti awanan, tarigagayam nga addaanka koma iti nawadwadwad tapno makaitedka iti ad-adu pay (kitaen iti Mosiah 4:24). Makitam ti bagim nga aggagar nga agserbi kadagiti annakmo ken ipakitam kadakuada no kasano ti agserbi kadagiti dadduma.

Bayat ti panagbalbaliw iti galadmo, mariknamto ti tarigagay a mangted iti dakdakkel a serbisio nga awan ti pammigbig. Ammok a dagiti disipulo ti Mangisalakan a nangted kadagiti naindaklan a sagut ti kuarta ken serbisio nga addaan iti determinasion nga awan ti asino man no saan a ti Dios ken dagiti annakna ti makaammo maipapan iti daytoy. Binigbig ti Dios ti serbisioda babaen ti panangparaburna kadakuada itoy a biag, ken paraburannanto ida iti agnanayon a biag nga umay (kitaen iti Mateo 6:1–4; 3 Nephi 13:1–4).

Bayat ti panagtungpalyo kadagiti bilin nga agserbi kadagiti dadduma (kitaen iti Mateo 22:39), mariknayo ti panagbalbaliw iti riknayo iti kinatangig. Inatur ti Mangisalakan dagiti Apostolna idi nagpipinnatangda no asino ti kaindaklanan kadakuada. Kinunana:

“Ket dikay met koma managan ti manangidaldalan, ta maymaysa ti Manangidalanyo, nga isu ni Cristo.

“Ngem ti kadakkelan kadakayo, isunto ti agserserbi kadakayo” (Mateo 23:10–11).

Suruannatayo ti Mangisalakan no kasano a makasursurotayo nga agserbi kadagiti dadduma. Nagserbi isuna a naan-anay, ket nasken a masursurotayo ti agserbi kas iti panagsursurona—nga ibinsabinsa (kitaen iti DkK 3:12–13). Babaen ti serbisio nga itedtayo,

makapagbalintayo nga ad-adda pay a kas Kenkuana. Agkararagtayo iti amin a pigsa ti puspusotayo nga aya-ten dagiti kabusortayo kas iti panagayatna kadakuada (kitaen iti Mateo 5:43–44; Moroni 7:48). Kalpasanna mabalina iti kamaudiananna a maikaritayo iti agnanayon a biag a kadenna Isuna ken ti Nailangitan nga Amatayo.

Ikarik a makapagserbitayo nga ad-adda pay a naan-anay no surotentayo dagiti pannursuro ken pagwadan ti Mangisalakan.

PANANGISURO MANIPUD ITI DAYTOY A MENSAHE

Inallukoynatayo ni Elder M. Russell Ballard ti Korum dagiti Sangapulo-ket-dua nga Apostol nga agkararag para kadagiti gundaway nga agserbi: “Iti kararagyo iti bigat iti tunggal baro nga aldaw, dawatenyo iti Nailangitan nga Ama a tarabayennakayo a mangbigbig iti gundaway a makapagserbi iti maysa kadagiti napapateg nga annakna. Kalpasanna mapankayo iti agmalem . . . agsapsapul iti maysa a tao a tulonganyo” (“Be Anxiously Engaged,” *Ensign* wenno *Liahona*, Nob. 2012, 31). Ibilangyo ti panangawis kadagiti sursuruanyo a mangituding iti panggep a tun-oyen nga agkararag iti tunggal bigat para kadagiti gundaway a makapagserbi ket kalpasanna sapulen ida iti agmalem.

AGTUTUBO

Maysa a Sungbat iti Kararagna Ni Siphilile Khumalo

Maysa a sardam binisitanak ti maysa a gayyem a sabali ti relihionna. Gagangay nga ad-adalek a sisiak dagiti nasantuan a kasuratak, ket inruarko dagitoy tapno adalek iti dayta a sardam. Natignayak a mangawis kenkuana tapno kaduaennak iti panagadalko iti nasantuan a kasuratan, ngem nagamakak ket rinugiak ketdi ti nagadal a sisiak. Ammok a diak inkaskaso ti parikna ti Espiritu. Kalpasan ti sumagmamano a minuto siaannad a dinamagko, “Kayatmo kadi ti makipagadal kaniak kadagiti nasantuan a kasuratan?” Saan a nagkedked nga insungbat ti gayyemko, “Wen.”

Nagbasakami ngarud iti Libro ni Mormon. Nagdamag kaniak iti sumagmamano a saludsod, ken mariknak a tartarayennak ti Espiritu bayat ti isungbatko. Imburayko ti pammaneknekk maipanggep iti kinapudno

ti Libro ni Mormon. Kalpasan nga inaramidko daytoy, kinunana kaniak, “Agmalmalem nga agsangsangitak ken mabutbutengak. Lепleppasko ti nagkararag iti Dios tapno agpatulong idi kiddawem kaniak a duata a mangbasa kadagiti nasantuan a kasuratan. Nasaysayaat ti riknak itan. Agyamanak.”

Inusarnak ti Apo kas maysa a ramit tapno masungbatan ti maysa a kararag ken mapagserbian ti maysa kadagiti annakna nga agkasapulan. Ammok a nadosan a pangiturong dagiti parikna a naggapu iti masirib, nagloriaan nga Ama. No lipatentayo dagiti panagbutengtayo, palugodantayo Isuna a mangiparangarang iti bilegna babaen ti panagtungpaltayo.

Agnanaed ti nagsurat iti Gauteng, South Africa.

ANNAK

Agsapul kadagiti Wagas a Pakapagserbian

Mabalin a pilienyoy ti sumurot ken ni Jesucristo ken agserbi kadagiti dadduma. Mangidrowingka iti ladawan ti bagim nga agserserbi iti maysa a miembro ti familia wenno gayyem ket ikabilmo ti drowingmo iti lugar a mangipalagip kenka nga agbalin a nasayaat iti inaldaw.

© 2014 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/13. Pannakaanamongna a maipatarus: 6/13. Pannaakaipatarus ti *First Presidency Message, March 2014*. Ilokano. 10863 864



Ti Nadiosan a Mision ni Jesucristo: Silaw ti Lubong

Nainkararagan nga adalenyo daytoy a material ken kalikagumanyo nga ammuen no ania ti ibinglay. Kasano a ti pannakaawatyo iti biag ken mision ti Mangisalakan ket mangpapigsa iti pammatiyo Kenkuana ken magparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Pammati • Pamilia • Tulong

Daytoy ket paset ti maysa a serye dagiti Mensahe iti Visiting Teaching a mangitampok kadagiti aspekto ti mision ti Mangisalakan.

Bayat ti pannakaawattayo a ni Jesucristo ti Silaw ti Lubong, mapapigsatayonto ti pammatitayo Kenkuana ket agbalintayo a silaw kadagiti dadduma. Pinaneknenkan ni Cristo ti akemna a “ti pudno a silaw a manglawag iti tunggal tao nga umay iti lubong” (DkK 93:2) ket indawatna nga “itag-aytayo ti silaw[na] tapno agraniag iti lubong” (3 Nephi 18:24).

Impaneknek pay dagiti prope-tatayo maipapan iti Silaw ni Cristo. Kinuna ni Presidente Henry B. Eyring, Umuna a Mammagbaga iti Umuna a Panguluken: “Tunggal kanito a piliyenyo ti mangikarigatan nga agbiag iti ad-adda pay a kas ti Mangisalakan, mapapigsayonto ti pammaneknekyo. Iti kamaudianan maammuanayonto mismo nga Isu ti Silaw ti Lubong. . . . Mayanninaw-yonto kadagiti dadduma ti Silaw ni Cristo iti biagyo.”¹

Kinuna ni Elder Quentin L. Cook ti Korum dagiti Sangapulo-ket-dua nga Apostol maipapan iti panag-balina a silaw iti lubong: Nasken a saluadantayo dagiti pamiliatayo

ket mangyunatayo a kaduatayo ti amin a tao iti kinaimbag iti pananagaramidatayo iti amin a kabaelantayo a mangtaginayon iti silaw, namnama, ken moralidad kadagiti komunidadtayo.”²

Manipud kadagiti Nasantuan a Kasuratan

Juan 8:12; Doktrina ken Katulagan 50:24; 115:5

Manipud iti Pakasaritaantayo

Itultuloy dagiti Santa iti ud-udina nga aldaw ti mangitag-ay iti silawda.

Iti maika-80 a kadsaaran ti nangato a pasdek iti Hong Kong, China, maysa a balasang nga ad-daan iti sagabaen iti bagi—ti kakaisuna a Santa iti Ud-udina nga Aldaw iti pamiliana—ket nangparnuay iti maysa a pagtaengan a kasla langit a pakariknaanna ken dagiti sangailina iti impluensia ti Espiritu. Iti asideg nakadulin dagiti nasantuan a kasuratanna, dagiti pagbasaanna iti Relief Society, ken ti hymbookna. Nagbiahe a napan iti templo tapno aramidenna dagiti ordinansa para kadagiti kapuonanna.”³

Idiay Brazil pinatanor ti maysa a

nalinteg nga ina dagiti annakna iti silaw ti ebanghelio. Napno iti kankanta ti Primary ti tangatang iti nalabaga a ladrilio a pagta-enganna, ken dagiti ladawan a naggapu iti *Liahona* dagiti templo, dagiti propeta ti Dios, ken ti Mangisalakan ti nakapaskil kadagiti diding. Nagsakripisioda nga agassawa tapno mailantipda iti templo tapno mayanak dagiti anakda iti katulagan. Kanayon nga ikarkararagna a tulongan koma ti Apo isuna a mangpatan-ay kadagiti annakna iti silaw, kinapudno, ken pigsa ti ebanghelio.”⁴

DAGITI NAGADAWAN

1. Henry B. Eyring, “A Living Testimony,” *Ensign* wenna *Liahona*, Mayo 2011, 128.
2. Quentin L. Cook, “Let There Be Light!” *Ensign* wenna *Liahona*, Nob. 2010, 30.
3. Kitaen iti *Daughters in My Kingdom: The History and Work of Relief Society* (2011), 163–64.
4. Kitaen iti *Daughters in My Kingdom*, 164.

Ania ti Maaramidko?

1. Ilawlawag no ania ti kayat a sawen ti agbalin a silaw ti lubong ita.
2. Utoben maipapan no kasano a makatulong kadakayo nga agibtur kadagiti pannubok ti silaw ni Cristo.